



**ACTA DA SESIÓN EXTRAORDINARIA 08/2021 CELEBRADA POLO PLENO DO CONCELLO, O DÍA 04/11/2021.**

**Concelleiras e concelleiros presentes:**

**Alcalde-Presidente:**

Secundino García Casal

**Asistentes:**

**BNG:**

María del Carmen Muiño Filgueira

Manuel Varela Mecías

Manuel Beceiro Couce

María Amparo Calvo González

Ana Belén Breijo Gundín

Tomás Calvo García

**PP:**

María Belén Trigo Meizoso

María Esther Díaz Vergara

José Luis Hermida Prieto

**PSOE:**

Lois Anxo Rodríguez Calvo

**Secretaria-interventora accidental:**

Mónica Cibreiro Caneiro

No Salón de Sesións da Casa do Concello de San Sadurniño, sendo as dezanove horas e trinta minutos do día catro de novembro do dous mil vinteún, comparecen as concelleiras e concelleiros arriba indicados, en presencia do devandito secretario, para a celebración da sesión ordinaria do Pleno do Concello oportunamente convocada polo Sr. Alcalde en cumprimento do establecido no Regulamento de organización, funcionamento e réxime xurídico das entidades locais, aprobado por Real Decreto 2568/1986, do 28 de novembro e no Regulamento Orgánico deste Concello.

Constatada a presenza de membros deste órgano en quórum suficiente, iníciase a deliberación dos asuntos de competencia do Pleno incluídos na Orde do Día da sesión, que son os seguintes:

**PARTE RESOLUTIVA:**

**PRIMEIRO.- APROBACIÓN, SE PROCEDE, DA SOLICITUDE Á DEPUTACIÓN PROVINCIAL DUNHA SUBVENCIÓN NOMINATIVA DESTINADA AO FINANCIAMENTO DO PROXECTO DE REHABILITACIÓN DA ESCOLA DE IGREXA FEITA PARA ESPAZO SOCIOCUNITARIO.**

Dase conta da proposta da Alcaldía relativa a este punto, que literalmente di:

**"PROPOSTA PARA O PLENO DA SOLICITUDE Á DEPUTACIÓN PROVINCIAL DUNHA SUBVENCIÓN NOMINATIVA DESTINADA AO FINANCIAMENTO DO PROXECTO DE REHABILITACIÓN DA ESCOLA DE IGREXA FEITA PARA ESPAZO SOCIOCUNITARIO**



### **ANTECEDENTES:**

A parroquia de Igrexafeita sitúase entre medias do val do río Castro e a serra do Forgoselo, polo sur, e do río Xubia, polo norte. É un territorio, polo tanto, con elevada dispersión territorial e con fortes pendentes.

Ante esta situación, nos anos sesenta do pasado século decídense crear unha escola na parte central da parroquia, para que os nenos e as nenas da redonda puidesen estar escolarizados.

Nomeadamente, o 31/12/1959 recíbese unha doazón dos terreos por parte dunha persoa particular, e nos anos seguintes o Ministerio se encarga da construcción da escola, seguindo modelo arquitectónico típico deste tipo de edificacións públicas.

Posteriormente, a comezos dos anos 70 créase o centro integrado de San Sadurniño, e as antigas escolas parroquiais pechan. Por este motivo, a Escola de Igrexafeita perdeu o seu uso, e o 16/11/1974 é desafectada por acordo plenario.

Dende aquela altura o edificio permaneceu pechado e sen uso, o cal repercutiu negativamente no seu estado de conservación.

Por este motivo, de cara a protexer o patrimonio construído, e de dar un novo uso a un edificio público, o Concello ten a pretensión de realizar un proxecto de rehabilitación integral da antiga escola, para destinala a novos usos sociais.

Nomeadamente, actuarase sobre a envolvente do edificio, fachadas, tellado e carpintaría exterior, para conseguir o illamento do edificio e a mellora do seu comportamento enerxético. Igualmente, vaise mellorar a acústica dos espazos, para evitar ecos e reverberacións.

Para a calefacción e a auga quente sanitaria utilizaranse fontes de enerxía renovables, coma a aerotermia.

Tamén se asegurará a accesibilidade completa do edificio, con accesos axeitados e a instalación dun ascensor para poder acceder ao segundo andar.

Internamente o edificio dotarase de dúas salas polivalentes e outras dúas salas de rehabilitación, nas que se poidan desenvolver as actividades sociocomunitarias, dous despachos para a atención ás persoas usuarias e ás súas familias, e mais dous cuartos de baño. Asemade, o centro contará con calefacción de chan radiante, para acadar un ambiente termicamente agradable.

O centro sociocomunitario de Igrexafeita ten pretensión de converterse nun recurso polivalente destinado á prestación de servizos e á realización de eventos relacionados coa atención sociosanitaria de determinados colectivos, como poden ser as persoas maiores ou aquelas con demencias degenerativas, coma o Alzheimer.

Para a súa xestión, o Concello está xa en conversas con diferentes entidades sociais da comarca, que amosaron o seu interese en facer uso deste recurso, de cara a achegar os servizos sociais especializados aos contornos rurais, sen ter que se desprazaren ata os concellos urbanos. Cómpre salientar que as nosas características demográficas dificultan, e

*moitas veces impiden, o acceso, e mesmo o coñecemento deste tipo de recursos por parte da poboación rural.*

*No mesmo senso, estase estudando a posibilidade de ampliar o ámbito do Centro cara a outros servizos que, dependendo da demanda ou da necesidade, se dirixan a outros tramos de idade, especialmente á franxa infantoxovenil.*

*Para poder levar a cabo este proxecto, o Concello quere contar co apoio financeiro da Deputación provincial. Os argumentos que motivan isto son:*

1. *O Concello acredita na necesidade de coordinar as súas actuacións e de cooperar activamente co resto das Administracións públicas de cara a continuar a traballar na mellora da calidade de vida dos nosos veciños e veciñas. Neste senso, vimos colaborando coa Deputación provincial de maneira habitual ao longo dos últimos anos, e estamos convencidos que este bo entendemento entre ambas as dúas partes vai seguir a dar os seus froitos, o cal redundará na mellora dos servizos que prestamos.*
2. *En segundo lugar, con esta actuación estarase asegurando o mantemento e a rehabilitación dun edificio público, protexendo e mellorando o patrimonio construído do propio Concello.*
3. *Dende o punto de vista económico, este tipo de intervencións teñen uns custos moi elevados, que poden resentir a estabilidade orzamentaria dun concello pequeno coma San Sadurniño. Por este motivo, consideramos que sería positivo que na rehabilitación da antiga escola e na súa conversión nun centro sociocomunitario colaboren o Concello e mais a Deputación.*
4. *Esta actuación non se solicita no marco do POS da Deputación porque no 2021 o Concello vai desenvolver outros proxectos que xa están solicitados e comprometidos. Tampouco pode ir dentro da futura convocatoria correspondente ao ano 2022 xa que é necesario realizar outros investimentos vinculados coa mellora da rede viaria municipal, que son urgentes e non se poden aprazar, tendo en conta que San Sadurniño é un municipio extenso (100 km<sup>2</sup>), cunha poboación totalmente dispersa (228 entidades de poboación) e con máis de 250 kms de estradas municipais asfaltadas, e outros tantos de camiños rurais.*
5. *Ademais, con respecto ao ámbito territorial deste proxecto, temos que salientar que o Centro non daría servizo exclusivamente a persoas de Igrexafeita, nin do Concello de San Sadurniño, senón que a pretensión é que se converta nun recurso de carácter comarcal. O Centro vai ter unha boa conectividade, xa que se atopa nas proximidades da autovía AG-64, que vertebría todo o territorio entre Ferrol e As Pontes, e que facilitaría o acceso de persoas da Capela, As Somozas, Neda, Narón, Moeche ou As Pontes, por exemplo. Polo tanto, é necesario salientar que o ámbito territorial deste centro será comarcal.*
6. *O orzamento total do proxecto sería de 299.850,69 euros (IVE incluído) e solicitamos á Deputación que se faga cargo do 80% do investimento.*

*Tendo en conta o precedente, no uso das atribucións que me confire a normativa vixente,*

**PROPOÑO,**

1. *Solicitar á Deputación provincial da Coruña unha subvención nominativa por importe de 239.880,55 euros, de cara a financiar o 80% do proxecto de rehabilitación da antiga escola da Pallota, de Igrexafeita, para espazo sociocomunitario, orzado en 299.850,69 euros (IVE incluído).*
2. *Aprobar o compromiso do Concello de incluír nos orzamentos municipais do ano 2022 a partida suficiente para a achega que lle corresponda ao Concello de cara a executar o proxecto.*
3. *Aprobar o proxecto "REHABILITACIÓN DA ESCOLA DE IGREXAFEITA PARA ESPAZO SOCIOCOMUNITARIO", redactado pola arquitecta municipal Montserrat Ruíz Fernández, cun orzamento total de 299.850,69 euros (IVE incluído).*
4. *Declarar que esta solicitude e o proxecto que se pretende desenvolver están plenamente xustificados, debido tanto ao carácter singular e excepcional do proxecto, centrado na creación dunha nova instalación de servizos sociais, como ao interese público e ao ámbito comarcal que ten esta actuación.*
5. *Declarar que es ta actuación non se solicita no marco do POS da Deputación porque non se pode incluir dentro da convocatoria actual, nin na correspondente a 2022 xa que é necesario realizar outros investimentos vinculados coa mellora da rede viaria municipal, que son urgentes e non se poden aprazar.*
6. *Facultar ao Alcalde para que actúe como representante ante a Deputación e proceda, se é o caso, á sinatura do correspondente Convenio de colaboración."*

A voceira do grupo de goberno expón a proposta.

Intervén o Sr. Rodríguez expón que é interesante tanto o proxecto coma a súa finalidade e propón que estea aberto a poboación de outros Concellos limítrofes.

A Sra. Muiño sinala que cando se madurou o proxecto se tomou contacto coa Asociación AFAL que é a que se encarga da atención especializada das persoas con Alzheimer na comarca. Dotouse dun deseño ambicioso de obradoiro para poder chegar a ser unidades terapéuticas de atención, porque efectivamente, dada a ubicación do centro se atopa en zona limítrofe con outros Concellos que viron de interese esa ubicación.

A Sra. Trigo mostra a súa conformidade co proxecto e considera que será un centro importante na comarca xa que será pioneiro e prestará un servizo que outros concellos non teñen.

**TERCEIRO.- APROBACIÓN, SE PROcede, DA MODIFICACIÓN DO REGULAMENTO DE ACCIÓN SOCIAL DO PERSONAL DO CONCELLO DE SAN SADURNIÑO.**

Dase conta da proposta da Alcaldía relativa a este punto, que literalmente di:

**"Proposta de modificación do Regulamento de acción social do persoal do Concello de San Sadurniño**

## **ANTECEDENTES**

*Logo da modificación do artigo 40 do I Convenio colectivo do persoal laboral do Concello de San Sadurniño, relativo ao Fondo social para o persoal laboral municipal, é preciso ampliar a súa cobertura tamén ao persoal funcionario, polo que é necesario aprobar un novo regulamento.*

*Neste senso, a Mesa xeral negociadora celebrada o 15 de outubro de 2021 acordou por unanimidade a aprobación da proposta do dito regulamento.*

*Por este motivo, no uso das atribucións que me confire a normativa vixente,*

## **PROPOÑO,**

1. A aprobación do Regulamento de acción social do persoal do Concello de San Sadurniño, que se achega como anexo.
2. Instar ao persoal municipal para que se publique e se difunda este regulamento entre o persoal municipal.

*San Sadurniño, 29 de outubro de 2021*

*Asdo.*

*O Alcalde,*

*Secundino García Casal*

*Anexo:*

### ***Regulamento de acción social do persoal do Concello de San Sadurniño***

#### **PRIMEIRO.- OBXECTO**

1. O artigo 40 do I Convenio colectivo do persoal laboral do Concello de San Sadurniño regula a constitución dun Fondo social para o persoal municipal.
2. O obxecto deste regulamento é dar cumprimento ao dito artigo e definir as accións, contías e normas de xestión do Fondo social.

#### **SEGUNDO.- ÁMBITO PERSOAL**

Poderá beneficiarse do Fondo social todo o persoal do Concello de San Sadurniño, quer funcionario, quer laboral, coa excepción do recollido na aliña segunda do artigo 2 do citado Convenio colectivo, que estea en situación en activo.

#### **TERCEIRO.- CONTÍA DO FONDO**

1. O Fondo social terá unha contía total de 5.000,00 euros.
2. Esta contía terá carácter anual, e poderá sufrir incrementos, no caso que a normativa de aplicación o permita e que se acorde entre as partes.

#### **CUARTO.-CONCEPTOS SUBVENCIONABLES**

1. *O Fondo social destinarase a reembolsar, totalmente ou en parte, a cantidad aboada polo persoal municipal no acceso aos seguintes servizos profesionais:*

- *Servizos de odontoloxía*
- *Servizos de oftalmoloxía*
- *Servizos de audioloxía*
- *Servizos de fisioterapia*
- *Servizos de podoloxía*
- *Servizos de ortopedia*

2. *O Fondo só cubrirá os servizos prestados directamente ás traballadoras e aos traballadores municipais.*

#### **QUINTO.-REPARTO DO FONDO SOCIAL**

*A cantidad disponible do Fondo social repartirse, ata esgotar o crédito, entre todas as solicitudes presentadas e que cumpran cos requisitos establecidos neste regulamento, cubrindo total ou parcialmente os gastos presentados.*

*O persoal beneficiario recibirá como máximo o montante de gastos que xustifique, ou a cantidad máxima sinalada na aliña seguinte, segundo o seu grupo de clasificación.*

*Debido a que, consonte o recollido no artigo 40 do I Convenio colectivo do persoal laboral, tenderase a unha distribución inversamente proporcional ao nivel xeral de ingresos de cada persoa beneficiaria, as cantidades máximas que se poderán recibir serán as seguintes, segundo o grupo de clasificación ao que pertenza o persoal beneficiario:*

- *Grupo A1 ,I ou similar: 200,00 euros*
- *Grupo A2 ,II ou similar: 300,00 euros*
- *Grupo C1 ,III ou similar: 400,00 euros*
- *Grupo C2 ,IV ou similar: 500,00 euros*
- *Grupo Agrupación profesional, E, V ou similar: 600,00 euros*

#### **SEXTO.-SOLICITUDES**

1. *As persoas incluídas no ámbito de aplicación do Fondo social que queiran beneficiarse del deberán realizar unha solicitude, segundo o modelo que se estipule, onde reflectirá os gastos dos servizos con cobertura efectuados entre o 11 de novembro do ano anterior e o remate do prazo de solicitude.*

2. *Asemade, deberán achegar coa solicitude as facturas e comprobantes dos referidos gastos.*

3. As solicitudes serán recollidas polo departamento de recursos humanos, e serán valoradas por unha comisión formada polo persoal do departamento e pola representación do persoal laboral e funcionario, que elevará á Alcaldía unha proposta de distribución do Fondo social.

#### **SÉTIMO.- PRAZO DE SOLICITUDE**

O prazo de solicitude rematará o 10 de novembro de cada ano.

#### **OITAVO.- PAGAMENTO E XESTIÓN**

O pagamento das achegas realizarase a finais de cada exercicio orzamentario. Nomeadamente o reembolso das cantidades correspondentes do Fondo social aboaranse coa nómina correspondente ao mes de novembro.

#### **NOVENO.- MODIFICACIÓN DO REGULAMENTO**

A asemblea convxunta de todo o persoal municipal poderá modificar este regulamento, atendendo ás necesidades e intereses do colectivo.

A voceira do grupo de goberno expón a proposta.

O Sr. Rodríguez e a Sra. Trigo mostran a súa conformidade coa proposta xa que esta foi negociada na Mesa Xeral de Negociación de Traballadores.

E non habendo máis asuntos que tratar, pola Presidencia levántase a sesión, sendo as dezanove horas e trinta minutos, redactándose a presente acta para a adecuada constancia do tratado e dos acordos adoptados, do que como Secretario certifico.